

दिनांक 28.05.2025

समय: 18.45 बजे

आकाशवाणी जयपुर-अजमेर
प्रादेशिक समाचार

- केन्द्रीय मंत्रिमंडल चौदह सिंयाळू साखां रा सरकारी मोल मांय बधोतरी ने मंजूरी दीनी।
- पाकिस्तान री सरहद कने रा राजस्थान समेत चार राज्यां रा न्यारा-न्यारा जिलां मांय काल नागरिक सुरक्षा अभ्यास कर्यो जावेला।
- राजस्थान माध्यमिक शिक्षा बोर्ड मैट्रिक रा इम्तिहान रो नतीजो जारी कीनो-93 दशमलव 6 फीसदी नतीजा सागे लड़कियां आगे रही।
- देश मांय ई साल चौमासा री सामान्य ऊं बत्ती बिरखा व्हेवण रा आसार-आवता महीना लू बाजण रा दिनां री तादाद कम रेहवण री संभावना।

000

केन्द्र सरकार चौदह सिंयाळू साखां रा सरकारी मोल मांय बधोतरी री मंजूरी दे दीनी है। प्रधानमंत्री नरेन्द्र मोदी री सदारत मांय आज व्ही केन्द्रीय मंत्रिमंडल री मीटिंग मांय ई समेत केई खास फैसला करी ज्या। सूचना अर प्रसारण मंत्री अश्विनी वैष्णव मीटिंग मांय करी ज्या फैसलां री खबरनवीसां ने जाणकारी देता थकां बतायो के कैबिनेट संशोधित ब्याज सब्सिडी योजना ई और आगे चलावण री मंजूरी ई दे दीनी। इण ऊं किसान कम ब्याज परां कार्यशील पूंजी हासिल कर सकेला।

मंत्रिमंडल रेलवे री करीब 3 हजार 399 करोड़ रुपया रा खर्चा वाळी दो मल्टीट्रैकिंग परियोजनावां ने ई मंजूरी दे दीनी। ई सागे ई न्यारी-न्यारी सड़क परियोजनावां ने ई मंजूरी दीरीजी।

000

राजस्थान, गुजरात, पंजाब अर जम्मू-कश्मीर मांय पाकिस्तान री सरहद कने रा जिलां मांय काल नागरिक सुरक्षा अभ्यास राख्या जावेला। ई दौरान, अहलकार लोगां ने आपातकालीन हालात रो सामो करण सारु जरूरी सिखावण देवेला। न्यारा-न्यारा धार्मिक संगठन, सरकारी महकमा, एनसीसी कैडेट्स अर एनएसएस रा खुद सेवक ई अभ्यास मांय सिरकत करेला।

000

सुप्रीम कोर्ट रो कॉलेजियम राजस्थान, त्रिपुरा, झारखंड अर मद्रास हाईकोर्ट रा मुख्य न्यायाधीशां रा तबादला री सिफारिश कीनी है। सुप्रीम कोर्ट रा मुख्य न्यायाधीश बी.आर. गवई ई कॉलेजियम रा अध्यक्ष है।

000

मुख्यमंत्री भजनलाल शर्मा आज राज्य रा सगळा जिला कलेक्टरां सागे मीटिंग कीनी। मुख्यमंत्री वां रा रहवास ऊं वीडियो कॉन्फ्रेंसिंग रे जरिए राख्यी ज्यी मीटिंग मांय आवता कार्यक्रमां रा बारा मांय जरूरी हुकम दीना। ई दौरान 'विश्व पर्यावरण दिवस', 'अंतरराष्ट्रीय योग दिवस' अर 'लोकमाता अहिल्याबाई होल्कर जयंती' समारोह री तैयारियां रा बाराम मांय निर्देश दिया ज्या।

000

राज्य मांय नगरीय निकायां रा ओजू गठन अर सीमांकन प्रस्तावां रा बारा मांय विचार सारू मंत्रीमंडलीय उपसमिति री आज दूजी मीटिंग व्ही। इण मांय समिति रा संयोजक झाबर सिंह खर्रा अर सदस्य जल संसाधन मंत्री सुरेश सिंह रावत, सहकारिता मंत्री गौतम कुमार दक अर वनमंत्री संजय शर्मा सिरकत कीनी। ई पहल रो मकसद राज्य रा नगरीय निकायां ने मौजूदा अर आवता बगत री जरूरतां रा हिसाब ऊं ढालणो है, ताकि जनता री प्रशासन ताई पहुँच आसान व्हे सके अर स्थानीय विकास और तेज व्हे सके।

000

सामाजिक न्याय अर अधिकारिता मंत्री अविनाश गहलोत बुजुर्गा ने देश री नींव बताया है, ज्यीं माथे देश रो मौजूदा बगत चाल रह्यो है अर भविष्य बणेला। श्री गहलोत आज जयपुर मांय बुजुर्गा ने मजबूत बणावण रा मकसद ऊं राख्यी ज्यी राज्य स्तर री कार्यशाला मांय बोल रह्या हा। वे कह्यो के सामाजिक न्याय अर अधिकारिता विभाग री ओर ऊं बुजुर्गा रा भला सारू श्रवण कुमार कल्याण सेवा आश्रम, मुख्यमंत्री पुनर्वास गृह, स्वयंसिद्धा आश्रम अर अटल वयो अभ्युदय योजना समेत केई योजनावां चलायी जा रही है। कार्यशाला मांय न्यारा-न्यारा सत्रां रे मार्फत बुजुर्गा ने योग, ध्यान, मानसिक स्वास्थ्य री देखभाल, सामाजिक सुरक्षा रा फायदा, डिजिटल साक्षरता अर साइबर हिफाजत रा बारा मांय जाणकारी दीरीजी। जिला स्तर माथे ई कार्यशालावां रे मार्फत बुजुर्गा ने न्यारी-न्यारी जाणकारियां दीरीजी।

000

राजस्थान माध्यमिक शिक्षा बोर्ड कानी ऊं लिया ज्या मैट्रिक रा इम्तिहान मांय 93 दशमलव 6 फीसदी विद्यार्थी पास व्हे गया। बोर्ड री ओर ऊं आज ई इम्तिहान रा नतीजा रो ऐलाण करी ज्यो। नतीजा रे मुजब ई दफा ई लड़कियां बाजी मारी। शिक्षामंत्री मदन दिलावर कोटा मांय कलेक्टर रा दफ्तर ऊं वर्चुअल तरीका ऊं अजमेर बोर्ड ऊं जुड़ र नतीजा जारी कीना। वे बताया के इम्तिहान मांय 94 दशमलव शून्य आठ फीसदी लड़कियां अर 93 दशमलव एक छह फीसदी लड़का पास व्हेया।

बोर्ड प्रवेशिका परीक्षा रा नतीजा रो ई ऐलाण कर दीनो है। कुल 7 हजार 99 विद्यार्थी प्रवेशिका परीक्षा दीनी ज्यां मांय ऊं करीब 82 प्रतिशत छात्र अर 85 फीसदी छात्रावां पास व्हे गया।

000

भारत ऊं भूटान अब रेलगाड़ी रे जरिये ई पूग्यो जा सकेला। नई दिल्ली ऊं 28 जून ऊं सरू व्हेवण वाळी आ अनोखी यात्रा पूर्वोत्तर भारत व्हेती थकी भूटान पूगेला। और ब्यौरो समाचार कक्ष री डॉ. सालेहा गाज़ी ऊं—

000

देश मांय ई दफा चौमासा मांय सामान्य ऊं बत्ती बिरखा व्हेवण रा आसार है। मौसम विभाग रे मुजब ई साल चौमासा री बिरखा बेगी व्हेवण लागी है अर आवता महीना कम दिन ताई लू बाजण रा आसार है। विभाग रा महानिदेशक मृत्युंजय महापात्र बताया के जून ऊं सितंबर महीनां बीचे व्हेवण वाळी बरसात मौसमी औसत ऊं बत्ती रेहवण री संभावना है।

प्रदेश मांय ई हवा मांय नमी व्हेवण ऊं उमस भरी गर्मी पड़ रही है, हालांकि लू मांय मामूली कमी आयी है। मौसम केन्द्र जयपुर रे मुजब काल ऊं पारो उतरण अर लू ऊं साता मिलण री उम्मीद है। ई बीचे भरतपुर, कोटा अर बीकानेर संभाग मांय आंधी अर बारिश रा बारा मांय ई चेतायी ज्यो है। भीलवाड़ा अर चित्तौड़गढ़ मांय ज़ोरदार गर्मी अर उमस पाछे धूलभरी आंधी चाली अर हल्की बरसात व्ही। लारला 24 घंटां मांय राज्य रा आतूणी हलकां मांय ज़ोरदार तावड़ो पड़्यो। बाडमेर, जैसलमेर, फलौदी, जोधपुर अर चूरू समेत केई ठौड़ां लू बाजी।

000

सलूमबर मांय आयुष विभाग री ओर ऊं आज तीन दिन रा मुफ्त स्वास्थ्य शिविर री सरुआत करीजी। शिविर रा प्रभारी डॉ. अश्विनी जोशी बतायो के शिविर मांय न्यारी-न्यारी बीमारियां री जांच करी जा रही है।

ई सागे ई लोगां ने तेज गर्मी अर लू ऊं बचाव रा उपाय ई बताया जा रह्या है। शिविर मांय आज केई मरीजां री जांच करी ज्यी अर बच्चां ने स्वर्ण प्राशन दियो ज्यो।

000

21 जून ने मणाया जावण वाळा अंतर्राष्ट्रीय योग दिवस रा दिन ज्यों-ज्यों नजदीक आ रह्या है, त्यों-त्यों राज्य मांय राख्या जा रह्या सामूहिक योगाभ्यास अर जागरुकता कार्यक्रमां मांय तेजी आ रही है। पत्र सूचना कार्यालय अर केन्द्रीय संचार ब्यूरो जयपुर री ओर ऊं काल जयपुर मांय पीआईबी की अपर महानिदेशक ऋतु शुक्ला री सदरत मांय योग संवाद सेमीनार राख्यो जावेला।

000

कृषि अर किसान कल्याण मंत्रालय री ओर ऊं देश मांय काल विकसित कृषि संकल्प अभियान सरु कर्यो जावेला। 12 जून तांई चलाया जावण वाळा ई अभियान रा तहत किसानां ने खेती री नुवी तकनीक रा बारा मांय जाणकारी दी जावेला अर सरकारी योजनावां री जाणकारी दी जावेला। ओ अभियान राज्य सरकारां री मदद ऊं 700 ऊं बत्ता ज़िलां मांय चलायो जावेला। ई दौरान कृषि वैज्ञानिकां री 2 हजार ऊं बत्ती टीमां 65 हजार गांवां मांय जा र लगभग डेढ करोड़ किसानां सागे बातचीत करेला। केन्द्रीय कृषि मंत्री शिवराज सिंह चौहान 15 दिन रा ई अभियान रे दौरान 20 राज्यां मांय जा र किसानां ऊं रू-बरू व्हेला। कृषि विभाग रा आयुक्त राजन विशाल बतायो के प्रदेश मांय ई ई अभियान ने सफल बणावण सारु जरूरी तैयारियां करी ज्यी है।

000

आजादी री लड़ाई मांय योगदान देवण वाळा वीर सावरकर ने आज वां री जयंती रे मौके सिरधा भाव सागे याद कर्या जा रह्या है। प्रधानमंत्री नरेन्द्र मोदी ई सोशल मीडिया पोस्ट रे ज़रिये वीडियो साझा करता थकां कह्यो के आजादी रा आन्दोलन मांय सावरकर री हिम्मत अर संघर्ष ने देश कदे ई नी भुला सके है।

000